

# CBETA電子佛典集成

---


CBETA Chinese Electronic Tripitaka Collection  
ebook

X70n1399

## 石屋清洪禪師語錄

(參學門人)至柔等編

中華電子佛典協會



# 目次

- [編輯說明](#)
- [章節目次](#)
  - [No. \\_1399-A 福源石屋珙禪師語錄原序](#)
  - [No. \\_1399-B](#)
  - [語錄](#)
  - [山居詩](#)
  - [五言律詩](#)
  - [七言絕句](#)
  - [歌](#)
  - [偈讚](#)
    - [示眾偈](#)
    - [送東林院主歸華亭](#)
    - [送慶侍者回里省師](#)
    - [海都寺求語](#)
    - [留進菴主](#)
    - [示居士劉鐵壁](#)
    - [山中四威儀](#)
    - [重巖之下十首](#)
    - [次韻送智西堂歸靈隱](#)
    - [會趙初心提舉](#)
    - [別南山經室](#)
    - [秋日秦川道中](#)
    - [偶作](#)
    - [冬至](#)
    - [却南州提舉再招](#)
    - [雪中示徒](#)
    - [送皇侍者](#)
    - [送漆匠](#)
    - [送直藏主禮育王](#)
    - [送就禪人禮祖](#)
    - [送松江深上人](#)
    - [送椿上人禮普陀](#)
    - [示禪上人](#)
    - [送雪峯維那](#)

- [送人游五臺](#)
- [送針工](#)
- [示直副寺坐圓覺期](#)
- [送寶監寺回大覺](#)
- [送愆上人回鄉](#)
- [送德都寺回里](#)
- [送直侍者](#)
- [送福上人禮祖](#)
- [示來上人](#)
- [送淨髮待詔二首](#)
- [又](#)
- [送圓上人](#)
- [送問上人歸大乘](#)
- [送人之五臺](#)
- [送門上人](#)
- [送明道者](#)
- [送大維那省母](#)
- [示茂道者](#)
- [示道人](#)
- [送勤上人](#)
- [示禪人二首](#)
- [英上人求語](#)
- [送維那之江西](#)
- [送凌侍者回淨慈](#)
- [送觀侍者](#)
- [示勒道者](#)
- [示眾](#)
- [示道者](#)
- [跋淨首座血書法華報親](#)
- [常侍者血書金剛經](#)
- [寄魁書記](#)
- [寄淨慈平山和尚](#)
- [寄友二首](#)
- [贈古樵](#)
- [贈無崖](#)
- [贈本源](#)
- [贈石崖](#)
- [贈無敵](#)

- [贈白庵](#)
- [贈別澗](#)
- [贈別峯](#)
- [直讚出山佛二首](#)
- [觀音大十二首](#)
- [羅漢二首](#)
- [達磨二首](#)
- [讚及菴和尚并師同幃](#)
- [白讚](#)
- [禪人求讚](#)
- [辭世偈](#)
- [No. 1399-C 福源石屋珙禪師塔銘](#)
- [卷目次](#)
  - 1.
  - 2
- [贊助資訊](#)

## 編輯說明

- 本電子書以「CBETA 電子佛典集成 Version 2023. Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

## No. 1399-A 福源石屋珙禪師語錄原序

昔。達磨大師壁觀少林。惟以一言傳心。默示真體。使人自證。初無多說。是以。二祖夙慧天稟。穎悟超然。故於密授之際。直證其妙。乃曰。了了常知。言不可及。達磨始印之曰。即此是自性清淨心。更勿疑也。其後。四世相傳。皆默證其體。而不顯言。至荷澤神會禪師。則記達磨有懸絲之讖。慮恐宗旨滅絕。遂明說知之一字。眾妙之門。至是。而真心之體。顯白於世。潛符密契者。不為不多矣。然而此心之知。虛靈寂照。性自神解。非世所謂仗境託緣之知。而為其體也。自唐以來。諸祖相傳。列派分宗。行棒行喝。至於擊叉舞笏。挽弓輓毬。各立玄門。建化不一。究其大機大用。無非直顯心體之妙。至不得已。而有上堂入室示眾等語。觀其激揚開導。要皆肆口而說。直截無隱。始及南宋以後諸師。漸乃組章繪句。流為造作。甚至有短拙新巧之論。使學語無稽之徒。轉相沿襲。大為有識所恥。殊不知。直指之道。以心傳心。必惟自證。纔涉言詮。即第二義。而況務為造作者耶。余每與通宗達士。語至於此。未嘗不為之大息焉。福源住山石屋珙公。早得及菴之傳。居山三十餘載。入定觀心。妙達真體。故其言語不是造作。寶自胸襟渾然流出者也。讀其山居諸偈。綽有寒山子之遺風。以及上堂示眾諸語。一皆切直諦當。有足警發於人。豈學語者。可以意識而模倣之哉。嗚呼。古道瀾倒之秋。邪說方熾。寥寥宇宙。作者無聞。安得起斯人於寂光淨居。而共論茲事焉。洪武十五年歲在壬戌春三月。前景德靈隱禪寺住山沙門釋豫章來復序。

## No. 1399-B

嘗聞。佛道不在文言。豈離文言而具佛道。眾生不能證佛。諸佛未曾分別眾生。乃佛入眾生不覺。眾生至佛不修。故曰。一坑無異土。源流即是水。譬喻風水相投。不期而偶。水無風而不波。風無水而不浪。風體本無其形。入水成章。池水定靜衡平。迎風鼓動。水風兩無交涉。動靜之相安在。直示不二法門。生佛了歸一體。入於圓宗。方為斯旨。道不在文言。三藏至今不絕。流行萬世。教是證宗之理文。謂宗入教。宗是達教之體詮。謂教明宗。後學之要。必不可少乎。然。古人機[目/兀]唾露洩滲。往來普引後賢。心解力濃。策警行踐。緣至一旦廓然而徹。乃化上行之衣傳。綿延後代。續祖燈之源流。諦信拈提。今石屋語錄。近世者希。先德歸去

時遙。迹遺墨流。閱其文字。知古衷言不可輕為者。老古錐。三十年居山。足不入閩。盡忘塵曉。清志堅澹。利不干懷。舍片雲消歸靈岫。演半偈襟胸月朗。開毫裂天河。濬川無際。湧一泉智水。流出寶藏。逝游峰頂。清遶雲外。實非抱息寒禪。枯根未絕。豈是坐井觀天。不知方外。此老。真為如來的派源流。一氣法末也。因清堅大師。仰古道風。聞悅怡暢。欣覓不勝。久望刊流。後攬一本。翻刻承布。若於斯文。普願嘗夫便覺出廣長舌。行人道曲。履步咸正。有智踏無為之鄉。無慮超乘戒之急。世色易辯。一相難分。特使無知無所不知。希逢者也願樂欲聞。

光緒十三年。重刻石屋語錄。閒居月塘鄉野。謹序。

No. 1399

福源石屋珙禪師語錄卷之上

參學門人 至柔 等編

師於元統辛未四月十三日入寺。指山門云。豁開戶牖。當軒者誰。喝一喝。

佛殿。因我得禮你。自倒還自起。鶉鳩樹上啼。意在麻畚裏。

據室。拈拄杖云。從上諸佛祖師。天下老和尚。總是揚蓬塵於水底。摘楊華於火中。新福源。又作麼生。卓拄杖。喝一喝。

拈廣教府疏云。老瞿曇。二千年前未了底公案。珙上座。今日就廣教府官手裏。與他了却。呈疏云。所供詣實。

拈山門疏云。鍋子大小。杓柄短長。自家裏事。何必論量。

指法座云。人天寶座。曲条木床。我今要坐即便坐。更不作禮須彌王。便陞座。拈香祝 聖畢 次拈香云。此一瓣香。爇向爐中。奉為前住湖州路道場禪寺及菴大和尚。用酬法乳之恩。乃云。把住也鋒芒不露。放行也十字縱橫。水雲深處相逢。却在千峰頂上。千峰頂上相逢。却在水雲深處。今朝福源寺裏。開堂演法。昨日天湖菴畔。墾土耕煙。所以道。法無定相。遇緣即宗。可傳真寂之風。仰助無為之化。正與麼時如何。拈拄杖卓一下云。九萬里鵬纔展翼。一千年鶴便翱翔。

復舉三聖道。我逢人則出。出則不為人。興化道。我逢人則不出。出則便為人。師云。只如今日山僧。是為人也。不為人也。若道為人。則屈著三聖。若道不為人。則屈著興化。且作麼生得恰好去。擊拂子云。戎夷蠻貊分諸國。總在吾皇化育中。

當晚小參。現前一眾。久在叢林。謂之參禪。謂之辨道。殊不知。一念未生已前。更無別物。纔擬心時錯了也。雪峰和尚。三登投子。九到洞山。如渴鹿趨陽焰。不知費了多少脚頭。如今要得現

成。直下自家看取。復有何事。無事切莫妄求。妄求而得。終非得也。

復舉南泉和尚道。自小牧一頭水牯牛。擬向溪東牧。未免食他國王水草。擬向溪西牧。亦未免食他國王水草。不如隨分納些些。總不見得。頌云。南泉放牧沒東西。兩岸春風綠草齊。總是國王家水土。不如隨分納些些。

結制上堂。四月十五日巳前。夜短睡不足。四月十五日巳後。日長饑有餘。正當四月十五日。福源寺裏禪和子。粥亦足。飯亦足。睡亦足。游戲圓覺伽藍。安居平等性智。敢問諸人。因甚得到這般田地。熏風入戶自生涼。湖水到門非有意。

謝專使并三塔和尚首座都市。上堂。睦州峻臨濟喫棒。不是好心。楊岐逼慈明晚參。不是好心。趙州訪道吾。不是好心。福源專使。逼人住院。且道。是好心。不是好心。珊瑚枕上兩行淚。半是思君半恨君。

上堂。若論此事。如農夫畊田相似。畊之以深。種之以時。所收必豐。輸官奉巳之外。綽綽有餘裕者。無他。力乎精勤而已。畊之不深。種之非時。所收必寡。輸官奉巳不足者。亦無他。困於怠墮而已。然而不責自己怠墮所需匱乏之。而反妬他人精勤而得之多。斯等人。名為可憐憫者。福源說話。意在於何。不圖打草。且要驚蛇。謝殿主淨頭。上堂。一身清淨。則多身清淨。一世界清淨。則多世界清淨。東司頭臭氣。佛殿裏蓬塵。從什麼處得來。以手掩鼻云。又有一點也。

上堂。三月安居一月過。園林是處綠陰多。蛙聲只在池塘裏。試問禪流會也麼。此方真教體。清淨在音聞。觀音菩薩。將錢買胡餅。放下却是饅頭。擊拂子云。打麩還他州土麥。唱歌須是帝鄉人。散青苗會上堂。天得一以清。地得一以寧。聖人得一天下和平。衲僧得一。事事現成。拈拄杖云。拄杖子得一。任運騰騰。晚來縱步東湖上。笑指禾苗一色青。

復舉瀋山開田次。仰山云。這頭得恁麼低。那頭得恁麼高。瀋云。水能平物。但以水平。仰云。水也無憑。但高處高平。低處低平。瀋山然之。頌云。片段高低總是田。瀋山父子見何偏。福源手不沾泥水。坐看禾收勝去年。

解制小參。不觸事而知。金井欄邊絡緯啼。不對緣而照。明月堂前秋巳早。統無邊剎境。為一微塵。無一塵不是大圓覺海。融十世古今。作箇念頭。無一念不是自恣時節。便與麼去。不涉程途。況乃橫檐拄杖。緊峭草鞋。足跡四方。鄉關萬里。謂之游江海涉山川。尋師訪道為參禪。盡是癡狂外邊走。更饒你跳上三十三天。一剎那



間。遊徧百億須彌盧。百億香水海。拈拄杖卓一下云。也離不得這裏。

解制上堂。今朝七月十五。涼風開我竹戶。嶺上一片兩片白雲。被他吹得七橫八豎。輕飄飄浮逼逼。欲散不散。欲聚不聚。老僧招手向白雲。白雲白雲何不住。到頭終是覓山歸。流落天涯與途路。喝一喝。

中秋謝藏主。上堂。天上月正圓。人間月方半。諸人恐未知。打鼓普請看。道是如來藏裏摩尼珠。又似賓頭盧尊者手中琉璃碗。比也不可比。辨也不可辨。天風吹露濕桂華。香浸雲邊廣寒殿。

上堂。達磨居少林。九年面壁。墻塹不牢。疎山賣布單。千里見人。路頭繁雜。福源這裏。墻塹堅牢。路頭平直。諸人。每日行在正路上行。住在穩密處住。中間一片田地。因甚踏不著。

復舉僧問古德。如何是清淨法身。古德云。家無小使。不成君子。師云。諸禪德。古人與麼答話。大似認奴作郎。今日忽有人問福源如何是清淨法身。只對他道。家無二主。

臘八上堂。只在中多少好。無端走入鬧籃來。眾生福薄難調制。一點明星是禍胎。

上堂。我有一句子。欲與諸人說破。又恐諸人罵我。不與諸人說破。又恐諸人疑我。且如今說即是。不說即是。撫膝云。知我罪我。我無辭焉。

解制上堂。九旬同禁足。自恣是今朝。暮雨青燈寺。西風白石橋。孤身三事衲。萬里一輕包。若到瀉山處。須防笑裏刀。

除夜小參。年亦窮月亦窮。三十六旬窮伎倆。破除全在五更鐘。窮則變變則通。尋常一樣窓前月。纔有梅華便不同。三條椽下禪和子。囊亦空鉢亦空。拾得斷麻穿破衲。不知身在寂寥中。惟有福源拄杖子。不屬陰陽造化功。了無春夏秋冬。自古自今。撐天拄地。同行同坐。嘯月吟風。又誰管你。江湖滾滾。日月匆匆。等閒靠在禪床角。一片雲中掛黑龍。

歲朝上堂。鏡清道。新年頭佛法有。明教道。新年頭佛法無。道是有也未必有。道是無也未必無。張公喫酒李公醉。趙州東壁掛胡蘆。

上堂。春風開竹戶。夜雨滴華心。一一與諸人。發向上機。演第一義。因甚不知。良久云。莫恠山僧太多事。光陰似箭暗相催。

元宵謝東班殿主并無念西堂。上堂。進以禮退以禮。天地與我同根。萬物與我一體。爛生薑陳皂角。舊筮籬破木杓。東頭賣賤。西頭賣貴。有利無利。不離行市。夜來無位真人。提金剛圈。點飛龍馬。走徧四天下。却與寰中和尚。在螻蛄眼裏。共賞元宵。天曉起來。依然即在赤肉團上。卓拄杖一下云。我見燈明佛本光瑞如此。

佛涅槃上堂。七十九年。賣弄脫空。二月十五。一場合殺。直饒藏得渾身。未免露出雙脚。百萬人天。雲散水流。丈六金身。煙消火滅。迦葉自歸雞足山。魔王嫉妬心方歇。諸仁者。要見釋迦老子麼。卓拄杖一下云。遍地春風桃李華。紅者自紅白者白。

上堂。知見立知。即無明本。知見無見。斯即涅槃。春山疊亂青。春水漾虛碧。寥寥天地間。獨立望何極。拈拄杖云。放過釋迦老子。卓拄杖云。穿却雪竇鼻孔。良久云。劔為不平離寶匣。藥因救病出金瓶。

浴佛上堂。舉世尊初生下。一手指天。一手指地。周行七步。目顧四方。乃言。天上天下。唯我獨尊。頌云。指天指地日吧吧。傍若無人自說誇。有意氣時添意氣。滿園香霧濕枇杷。

結制小參。明朝結制。今夜小參。福源不是琅玕。點出五般病。西院商量兩箇錯。一夏九十日。諸人不得妄動一步。一日十二時。諸人不得妄起一念。不起一念。而即證無生。不動一步。而徧遊沙界。如斯履踐。無一日不是安居。自能笑傲林泉。誰管坐消歲月。纔與麼便不與麼。不見雲門和尚道。直得盡乾坤大地。無纖毫過患。始是轉句。不見一法。猶是半提。更須知有向上全提時節。卓拄杖一下云。我愛夏日長。人皆苦炎熱。

結制上堂。諸人未結制已前。天台南嶽。峨眉五臺。要去便去。要來便來。因甚結制已後。頂笠腰包。草鞋拄杖。總用不著。咄。莫道布袋頭不在山僧手裏好。

上堂。十五日已前。夜短睡不足。十五日已後。日長饑有餘。正當十五日。飯白如雪。扇團似月。打扇喫飯。猶嫌道熱。釋迦老子道。知足之人。雖臥地上。猶為安樂。不知足者。雖處天堂。亦不稱意。又道。假使百千劫。所作業不忘。因緣會遇時。果報還自受。灼然灼然。善惡若無報。乾坤必有私。

復舉東印土國王。請般若多羅齋次。乃謂祖曰。諸僧皆轉經。惟師為甚不轉經。祖曰。出息不涉眾緣。入息不居陰界。常轉如是經。百千萬億卷。豈止一卷兩卷。師云。諸禪德。般若多羅。與麼答話。醫得眼前瘡。剗却心頭肉。若有人問福源。諸僧皆轉經。長老因甚不轉經。只對他道。白日窓前。青宵月下。要轉便轉。要罷便罷。且道。與般若多羅。還有優劣也無。若檢點得出。許你具一隻眼。

及菴和尚忌日拈香。有來由沒巴鼻。建陽山西峯寺。蒲團頭拾得底。無眼無耳。無頭無尾。道是一塊兜樓。嗅著又無香氣。家醜不可外揚。明人不作暗事。

上堂。黃梅俾老盧踏碓。石頭譏藥山不為。有一丈蓬。可以使八面風。無三尺鞭。難以控千里馬。伊蘭園裏。不生旃檀。黃蘗樹頭。

有甚蜜果。

上堂。動若行雲。止猶谷神。水中鹹味。色裏膠青。細雨濕衣看不見。間華落地聽無聲。

上堂。神光不昧。萬古徽猷。但從己覓。莫向外求。養雞意在五更頭。

上堂。所聞不可聞。所見不可見。昨夜五更風。吹落桃華片。蒼苔面上生紅霞。百鳥不來春爛熳。

上堂。我本山林拙比丘。等閒來此伴禪流。縱饒相聚人情好。那箇人情得到頭。休休休。綠霧紅霞千嶂錦。西風黃葉一天秋。

上堂。月出海門東。金波浩渺渺。圓又圓不虧。明又明得好。寄語白兔翁。說與嫦娥道。收彩不宜遲。潛光須及早。莫待黑雲四面來。一天光彩都無了。世間惟有道人心。歷劫至今常皎皎。

謝藏主上堂。今朝八月一十五。樹凋葉落金風露。野狐窟宅梵王宮。狗子尾巴書卍字。大藏小藏從何來。拈拄杖云。盡從這裏流將去。等閒道箇鉢囉娘。截斷古今閒露布。

上堂。一日一日復一日。二三四五八九十。數到紅殘綠暗時。人間又是四月一。朝悠悠暮悠悠。滿目毗盧藏海。棄之認一浮漚。休休。修心未到無心地。萬種千般逐水流。

上堂。喫飯要止饑。飲水要止渴。著衣要防寒。歸鄉要到家。學道要到三世諸佛開口不得處。參禪要到天下祖師插脚不入處。若不如此。倚他門戶。傍他墻壁。聽人指揮。喫人唾唾。總不丈夫。福源與麼說話。良藥苦口。忠言逆耳。

空巖印首座至。上堂。睦州峻臨濟。問黃蘗佛法大意。三度六十拄杖。口乃招禍之門。還有免得此過者麼。良久云。空生巖下坐。天雨四華來。

上堂。六月七月天不雨。農夫曉夜忙車水。背皮焦裂脚底疼。眼華無力欲悶死。公人又來逼夏稅。稅絲納了要盤費。大麥小麥盡量還。一日三餐不周備。思量我輩出家兒。現成受用都未知。進道身心無一點。東邊浪蕩西邊嬉。三箇五箇聚頭坐。開口便說他人過。及乎歸到暗室中。背理虧心無不做。莫言墮在異類中。來生定作栽田翁。前來所說苦如此。那時難與今時同。古德訓徒有一語。對人天眾拈來舉。緇田無一簣之功。鐵圍陷百刑之苦。

上堂。佛法無人說。雖慧莫能了。開口便不是。我宗無語句。亦無一法與人。不開口也不是。五馬不嘶。一牛飲水。開口不開口總不是。仁者見之謂之仁。智者見之謂之智。

上堂。百丈教人開田。通身泥水。佛眼俾僧修造。滿地木楂。楊岐逼慈明晚參。成人不自在。趙州教巖陽放下。自在不成人。福源與麼道。也是為他閒事長無明。

上堂。是聖是凡。入門便見波斯鼻孔。開眼便見蚌蛤心肝。開口便見諸人兩莖眉毛橫在面上。因甚看他不見。明眼人前三尺暗。病起上堂。舉茗溪和尚示眾云。吾有大病。非世所醫。後有僧問曹山。未審。是甚麼病。山云。攢簇不得底病。又問。一切眾生。還有此病也無。山云。老僧正覓起處不得。師云。這僧是病過的人。極是搜尋。得到頭髮尖裏。也不放過。若非曹山。知他落處。其他難為啟口。復成一偈。舉似大眾。百骨酸疼攢簇難。一番熱了一番寒。覓他起處竟不得。藥銚風爐盡打翻。

冬節小參。洞山掇退果卓。取捨未忘。玉泉不洗布裩。固執難斷。福源寺是箇般時節。就中却不同梅放孤標。依舊暗香浮動。線添寒影。又逢佳景迎春。燈籠裏帽。水底吹笙。露柱著衫。雲中作舞。是汝諸人還委悉麼。一百五日。是清明。清明更在寒食後。

復舉僧問古德。如何是冬來意。德云。京師出大黃。頌云。有問冬來意。京師出大黃。地爐深夜火。茶熟透瓶香。

謝都寺冬齋并維那。上堂。一一徧一切。一切徧一一。香積世界。以香飯為佛事。南閻浮提。以音聲為佛事。東勝神州打槌。西瞿耶尼普請。懷州牛喫禾。益州馬腹脹。粗糲易飽。細嚼難饑。只恐不是玉。是玉也大奇。

及菴和尚忌日拈香云。沒興相逢處。西峰與建陽。不平多少事。盡在一爐香。

歲旦上堂。鐘樓上念讚。床脚下種菜。勝首座道。猛虎當路坐。福源這裏。山門頭賀正歌唱。佛殿裏祝聖[言\*奉]經。一種是聲無限意。有堪聽有不堪聽。諸人還曾檢點得出麼。喝一喝。下座。

元宵上堂。南閻浮提。以音聲為佛事。十方俱擊鼓。十處一時聞。福源寺裏上堂。西林寺裏一一聽得。西林寺裏念佛。福源寺裏一一聽得。讚嘆也獲一分功德。毀謗也獲一分功德。一即一切。一切即一。鸚湖市上做元宵。因甚東家點燈。西家暗坐。你也理會不得。我也理會不得。冷水浸冬瓜。大家相濕[泳-永+盾]。

佛涅槃上堂。身口意清淨。是名佛出世。身口意不淨。是名佛涅槃。人情不能恰好。世界難得團圓。晝長夜短。秋熱冬寒。一把柳絲收不得。和烟搭在玉闌干。

聖節上堂。蟠桃三千年華開。聖人五百歲出現。拈拄杖云。蟠桃華開也。卓拄杖云。聖人出現也。靠拄杖云。天下太平。

結制上堂。福源今日結制。不得不為諸人議定。第一。從朝至暮。舉足下足。不得踏著常住地。若踏著常住地。定犯著波羅夷罪。第二。十二時中。不得向鼻孔裏出氣。若向鼻孔裏出氣。定犯著波羅夷罪。第三。件事且莫說。且莫說。留在七月十五日也未遲。甕裏何曾走却鱉。

上堂。日日日東出。日日日西沒。出沒知幾迴。又是五月一。咄哉門外人。把手牽不入。拽杖獨歸來。門開空嘆息。

示眾。古德道。結夏半月日了也。水牯牛作麼生。有者道。結夏半月日了也。寒山子作麼生。福源道。結夏半月日了也。已躬下事作麼生。莫是早晨起來洗面。洗面了喫粥。喫粥了喫飯。喫飯了放參。放參了打眠。是已躬下事麼。莫是東廊上西廊下。寮舍裏山門頭。鼓扇是非。是已躬下事麼。莫是看諸子百家。長篇短章。高談濶論。傍若無人。是已躬下事麼。莫是經卷上搏量。語錄上卜度。未得謂得。未證謂證。是已躬下事麼。莫是禮幾拜佛。看幾卷經。燒兩箇指頭。燃幾炷頂香。誑惑世人。希求利養。是已躬下事麼。莫是長連床上。閉眉合眼。昏昏沉沉。懵懵懂懂。空過時節。是已躬下事麼。如此反不及三家村裏拖鋤頭漢。栽田種地。養口資身。却無罪過。我輩沙門釋子。仗如來慈蔭。不耕而食。不蠶而衣。高堂大廈。廣殿修廊。十指不沾水。百事不干懷。種種現成。般般便當。只為現成。只為便當。却乃縱情放逸。非法貪求。不修僧業。不清戒律。不明因果。不畏罪福。寬裏做債。造地獄因。閻家老子。沒人情無面目。一善一惡。主籍分明。一發與你打筭。莖蠶粒米。滴水寸絲。盡要酬還。福源與麼告報。也是為他閒事長無明。上堂。一塵起大地收。四月十五日。結却布袋頭。一葉落天下秋。七月十五日。解却布袋頭。正當自恣。何證何修。草鞋底北鬱單越。拄杖頭南瞻部洲。朝悠悠暮悠悠。無拘無束。自在自由。老豐干忽然出來道。我與汝同往五臺禮文殊。又且如何。搖手云。你不是我同流。

中秋上堂。黑月難見。白月易見。黑白未分已前。眼見何如心見。所以道。見見之時。見非是見。見猶離見。見不能及。卓拄杖云。昨夜蟾宮桂子開。好風吹下天香來。昭王白骨埋青草。無人為掃黃金臺。

上堂。澄一念虛明。未脫三乘羈鎖。認八處出現。正迷自己靈光。直饒平白地上轉身。荊棘林中移步。脚跟下好與三十棒。何故。不因樵子徑。爭到葛洪家。

天壽聖節上堂。箕翼長明。地天長泰。風不鳴條。雨不破塊。君乃堯舜之君。俗乃成康之俗。王母晝夜雲旗翻。海山四月蟠桃熟。

上堂。十月初一日開爐。諸方說寒道熱。福源一味尋常。不會安排施設。深深埋兩箇炭團。滿滿堆一爐黃葉。莫嫌火種無多。只要煖氣相接。放下重簾。密糊窓縫。又誰管你屋上濃霜。庭前深雪。但得自家屋裏一團和氣。外邊冷言冷語不須聽。由他自歇。諸禪德。本色住山人。且無刀斧痕。

上堂。一心不生。萬法無咎。無咎無法。不生不心。所以道。山僧居菴時。只見居菴時境界。門對千峰。心閒一境。朝看白雲冉冉。暮聽流水潺潺。煮藜藿于折脚鐺中。穿破衲于尖頭屋下。自由自在。無束無拘。娑羅樹影落天湖。簷蔔華香浮臺石。是非不到。名利杳忘。住院時。即見住院時境界。門連湖市。地接海州。早起晏眠。迎來送去。整規模于顛危之際。聚衲子于寂寞之中。漁歌牧笛長聞。山色溪光罕見。紅塵滾滾。白日匆匆。且道。住湖寺。居山菴。是同是別。良久云。無山不帶雲。有水皆含月。

祈雨上堂。記得去年時五月。火雲燒田天不雨。家家插種望今年。不料今年又如此。偉哉公侯將相心。憂民切切如憂己。叩之龍神便感靈。來此閻浮澍甘雨。霈然不止三日霖。天人羣生悉歡喜。敢問諸人。且道承誰恩力。以拂子擊禪床云。蘇嚕蘇嚕。唵哩唵哩。復舉僧問乾峯。十方薄伽梵。一路涅槃門。未審。路頭在甚處。峰以拄杖劃一劃云。在這裏。僧舉似雲門。門拈起扇云。扇子[跳-兆+孛]跳。上三十三天。築著帝釋鼻孔。東海鯉魚打一棒。雨似盆傾。頌云。萬仞龍門一拶開。傾盆驟雨假風雷。袈裟打濕歸來看。半是紅雲半海苔。

上堂。鳩毛毒。未是毒。筭來不似人心毒。三伏熱。未是熱。思量無出人心熱。阿修羅王。常好罵天。善星比丘。偏要謗佛。道高一尺。魔高一丈。汝之伎倆有盡。我之不採無窮。

七月旦上堂。人間秋十日。湖寺便生涼。竹色溪邊綠。荷花鏡裏香。即心猶未是。作境謾搏量。空劫已前事。今朝為舉揚。

解制上堂。有佛處不得住。樓臺月色雲收去。無佛處急走過。池塘荷葉風吹破。三千里外。逢人不得錯舉。朗州山澧州水。四海五湖皇化裏。腰包頂笠萬千千。問著盡言山與水。忽有不甘底。出來道。山但言山。水但言水。有甚麼過。良久云。未可全拋一片心。逢人且說三分話。

上堂。行脚高人。說箇參禪。說箇辨道。恰如坐在飯籬裏叫肚饑相似。通身是飯。你自不肯喫。又干他別人甚麼事。十二時中。動轉施為。全是一條潑天大路。且無荊棘瓦礫。礙汝脚跟下。你自不肯進步。又于他別人甚麼事。諸佛有甚麼勝如凡夫凡夫有甚麼不如諸佛。彼既丈夫我亦爾。何得自輕而退屈。驀拈拄杖云。如來說一合相。即非一合相。明月蘆華何處尋。想伊只在秋江上。

中秋上堂。初三月十五日。缺時無圓。圓時無缺。圓缺不相干。清光常皎潔。昨夜蟾宮雨露多。天風吹落黃金屑。

復舉嚴陽尊者問趙州。一物不將來時如何。州云。放下著。嚴云。一物不將來。放下箇甚麼。州云。放不下擔取去。頌云。香飄桂子十分月。雨滴芙蓉一半秋。門外任他時節換。穩將衲被自蒙頭。

上堂。學道參禪。心地未明。已眼未開。情塵未脫。命根未斷。恰如甚麼相似。恰如有眼人步入千年暗室中相似。目前雖有一切物色相傾。竟不知其是青是黃。是赤是白。是長是短。是方是圓。懵然無知。黑漫漫地。若如此。在袈裟下。如何消得人天供養。學道參禪。心地已明。已眼已開。情塵已脫。命根已斷。恰如甚麼相似。恰如大海底輓出一團紅日相似。千年暗室。一照照破。目前所有一切種種物色。青黃赤白。長短方圓。一一明了。一分分曉。那時正好向二條椽下。七尺單前。長養聖胎。閒閒度日。若如此。在袈裟下。方始消得他人天供養。然雖如是。更須知道。福源門下。一條生鐵門檻。高而無上。廣莫可測。在外者。要人不能得入。在內者。要出不能得出。也須是著些精彩。用些氣力。跳過始得。若也擬議。不是撞頭磕腦。便是墮坑落塹。莫言不道。臘八上堂。雪山高且深。忍凍吞麻麥。如此過六年。酌然是快活。無端覩明星。剛言成正覺。拂袖下山來。早是低一著。更云度眾生。重重露拴索。看他世上榮。何似山中樂。錯錯。年年有箇臘月八。

入新僧堂上堂。直為柱。曲為梁。矩中圓。規中方。匠氏取材之良也。歸其圓。泯其方。捨其短。取其長。主人立法之妙也。所以福源僧堂。建柱石于丙子之孟春。畢斧斤于戊寅之重九。六窓炯炯。洞一色之虛明。萬瓦鱗鱗。絕三種之滲漏。低頭不見地。還他擔板禪和。仰面不見天。却許蒙頭衲子老竹溪。豈止一生行願。憍陳如。頓增萬倍威光。遵行百丈叢林。壯觀千年常住。直得十方諸佛。異口同音。宣說偈言。佛子住此地。則是佛受用。常在於其中。經行及坐臥。又有龐居士。說箇頌子讚嘆云。十方同聚會。箇箇學無為。此是選佛場。心空及第歸。然雖如是。其柰張無盡。忍俊不禁。出來道。汝等諸人。即解樹頭喫菓子。不知樹曲条。殊不知。作此堂者。有損有益。居此堂者。有利有害。這般說話。也恁伊不得。何故。人無遠慮。必有近憂。此事且拈放一邊。祇如衲僧自己分上得力句子。作麼生道。良久云。饑飡渴飲渾無事。聽雨聞風閑打眠。

開爐上堂。法昌和尚道。法昌今日開爐。行脚僧無一箇。惟有十六高人。緘口圍爐打坐。福源不與麼道。福源今日開爐。炭鑿也無一箇。五湖四海禪和。衲被蒙頭打坐。不是冷眼傍觀。免見挑灰弄火。寬心寧耐到春來。屋外梅花香朵朵。

冬節小參。諸禪德。如今是甚麼時節。羣陰欲去未去。一陽欲來未未。陰不得為陰。陽不得為陽。山不得為山。水不得為水。日月星辰。六十甲子。一齊打亂。沒商量處。水泄不通。無柰何時。放開一線。便見地中雷復。律管灰飛。燄發冰河。筍抽寒谷。依舊山即

是山。水即是水。日月星辰。六十甲子。各歸舊位。是法住法位。世間相常住。卓拄杖下座。冬節上堂。昨夜陰回陽復爻。曉來湖岸見冰消。皇宮日影喜添線。胡地筍長梅破梢。春漏一痕舒柳眼。雲拖五色束天腰。明明空劫已前事。不是虛言誑爾曹。

上堂。臘月一。水生骨。虛明白照。不勞心力。白鷗寒鴈蘆花。無處尋他踪跡。待得日煖冰融水面寬。依舊飛來照破碧光碧。

復舉麻谷至章敬。遶禪床一匝。振錫一下。卓然而立。敬云。是是。又至南泉。遶禪床一匝。振錫一下。卓然而立。泉云。不是不是。谷云。章敬道是。和尚因甚麼道不是。泉云。章敬是是。汝不是。此是風力所轉。終歸敗壞。輒成一頌。普告人天。尺可量兮秤可平。短長輕重要分明。都盧祇是一雙手。難掩世間人眼睛。

九臯學士至。上堂。諸佛廣大門風。祖師向上巴鼻。初非明悟見知。而可擬議。又非世智辯聰。而能髣髴。直使盡天下衲僧。捫摸他不著。亦不令住在無捫摸處。有此大丈夫氣槩。方能成辦大丈夫事。此非一生兩生行願得成。乃是多劫多生淨業增熏。方能如此。無一法從懶墮懈怠中生。豈不見。二祖立雪。五祖栽松。六祖踏碓。仰山牧牛。雪峯在德山做飯頭。踈山賣了布單。三千里外行脚。長慶坐破七箇蒲團。香林侍雲門一十八年。張無盡一宿龍安。黃太史十遊幕阜。裴丞相悟心於黃蘗言下。龐居士得旨於馬祖室中。先輩大儒。古來老衲。是皆苦志勞形。究明此道。豈似如今禪和家。華居豐食。致身於叢林中。視叢林如驛舍。口裏說道。參禪辦道。聞說禪道。如風過樹。此等名為可憐憫者。我此現前一眾。宿因深正。得在此處。清淨伽藍。同居共處。當生希有難遭之想。豈可也學他。今時流輩荒逸。終日無所用心。逐隊隨羣。說黃道黑。略無少念回光返照。我今此身。四大和合。所謂毛髮爪齒。皮肉筋骨。髓腦垢色。皆歸於地。唾涕膿血。津液涎沫。痰淚精氣。大小便利。皆歸於水。煖氣歸火。動轉歸風。四大各離。今者妄身。當在何處。若向這裏。回光返照。著得一隻眼。便見應菴和尚道。若作地水火風商量。釋迦老子。盡塵沙劫。無出頭分。不作地水火風商量。如將魚目擬比明珠。二途不涉。何異畫餅充饑。山僧與麼舉揚。有智若聞。則能信解。無智疑悔。則為永失。

復舉東坡。夜宿東林。與照覺道話有省。呈頌云。溪聲便是廣長舌。山色豈非清淨身。夜來八萬四千偈。他日如何舉似人。師云。諸仁者。我觀王公大臣。好此道極多。至於談道之際。箇箇喜人順己。怕人針筭。所以東坡居士。被照覺活埋。在聲色堆裏。至今無出身路。翰林九臯學士。來我山中。清話連日。述偈數篇。等是一



種語言三昧。中未曾道著元字脚。祇這便是出他古人一頭地了也。乃撫膝云。鶴有九臯難翥翼。馬無千里謾追風。除夜小參。北禪分歲。三代禮樂全。該王老燒錢。一種盃盤狼籍。珙上座。固守清貧。兼逢歉歲。難與諸方鬪富。從年頭直至年尾。共諸人同家共活。豐儉隨宜。終不陪面去。借地栽花。虐粧好漢。且就自家屋裏。量水打碓。免見求人。但每日二時。牽補得過。便可塞住持之責。古人有言。時挑野菜和根煮。旋斫青柴帶葉燒。不是爺貧連子苦。免教家富小兒嬌。歲旦上堂。新年頭說話。舊年裏不同。舊年裏說話。新年頭不同。秦山雪解。湖岸冰融。髮從今日白。華是去年紅。元宵上堂。山堂兀坐思悠悠。節令推遷莫暫留。新歲始聞歌鼓吹。元宵又見挂燈毬。心田荊棘參天長。業海波濤滾底流。不向死前先畫策。草根從自鑠枯體。上堂。報緣虛幻。豈可強為浮世。幾何隨家豐儉。淡靜生涯水一湖。寂寞相從雲數片。思量誰是箇般人。獨自舉頭天外看。擊拂子下座。二月旦上堂。道遠乎哉。觸事而真。自携瓶去沽村酒。却著衫來作主人。聖遠乎哉。體之則神。但見落花隨水去。不知流出洞中春。要識肇法師麼。豎起拂子云。枇杷葉是馬家親。眼裏無筋一世貧。上堂。春眠不覺曉。處處聞啼鳥。夜來風雨聲。花落知多少。世尊三昧。迦葉不知。迦葉三昧。阿難不知。山僧三昧。諸人不知。所以道。諸法無作用。亦無有體性。是故。彼一切各各不相知。雖各不相知。諸法元無二。便與麼去苦樂逆順。道在其中。若不然者。柳絮隨風自西自東。卓拄杖下座。聖節上堂。盡大地是國王水土。無一物不受王恩。盡十方是古佛道場。無一日不為佛事。莫有知恩報恩者麼。下座。同詣大雄寶殿。啟建天壽聖節。上堂。收足上蒲團。坐一參禪則易。伸手展鉢盂。喫三厨粥則難。夜短眠不足。日長饑有餘。置而勿論。你道。賓頭盧走入僧堂裏。與橋陳如商量箇甚麼事。良久云。縱然為客好。爭似在家貧。結制上堂。今朝四月十五日。行脚師僧念頭息。草鞋乾晒待秋風。金錫罷遊留靠壁。鷓鴣偏愛守空池。鳳凰豈肯棲荊棘。平生肝膽向人傾。相識猶如不相識。聖節滿散上堂。天下無二道。混四海而為一家。聖人無二心。視百姓猶如一子。所以道。心同虛空界。示等虛空法。證得虛空時。無是無非。法如天普蓋。似地普擎。元元自化。蕩蕩難名。好。諸禪德。但見皇風成一片。不知何處是封疆。

平山和尚至。上堂。即心即佛也不是。非心非佛也不是。不是心不是佛不是物也不是。恁麼也不是。不恁麼也不是。恁麼不恁麼總不是。子細看來。直教你無用心處。正好用心。卓拄杖云。藕穿平地為荷葉。笋過東家作竹林。

復舉芙蓉訪實性大師。以右手拈拄杖安左邊。良久云。若不是芙蓉師兄。也大難委悉。師云。諸仁者。實性大師。聞名富貴。見面貧窮。自家骨肉相看。也只作路岐相待。今日平山法兄。久出歸來福源。雖則囊空橐虛。未免將無作有。卓拄杖云。人情淡處道情濃。熨斗煎茶銚不同。

迴院上堂。老牯偷閑去半年。祖翁田地草芊芊。歸來懶更重還債。犁杷春風又上肩。是即是祖禰不了。逃難逃宿業拘牽。四蹄耕白水。兩角指青天。拍膝一下云。可惜無人知此意。風前令我憶南泉。

退院上堂。卸却項上鐵枷。颺下手中木杓。合眼跳過黃河。騰身衝開碧落。獅子趯倒玉闌干。象王擺壞黃金索。白雲兮處處相逢。青山兮步步踏著。喝一喝云。舉頭天外看。誰是箇般人。

示眾云。吾佛世尊。有四種清淨明誨。所謂攝心為戒。因戒生定。因定發慧。云何攝心。何名為戒。若諸世界六道眾生。其心不婬。則不隨其生死相續。又道。若不斷婬修禪定者。如蒸砂石欲其成飯。經百千劫。祇名熱砂。何以故。此非飯本砂石成故。汝以婬身求佛妙果。縱得妙悟。皆是婬根。根本成婬。輪轉三途。必不能出。又道。若不斷殺修禪定者。譬如有人自塞其耳。高聲大叫。求人不聞。此等名為欲隱彌露。清淨比丘。於岐路行。不踏生草。況以手拔。云何大悲。取諸眾生血肉充食。名為釋子。又道。若不斷偷修禪定者。譬如有人水灌漏卮。欲求其滿。縱經塵劫。終無平復。若諸比丘。衣鉢之餘。分寸不畜。乞食餘分。施餓眾生。又道。若諸世界六道眾生。雖則身心無殺盜婬。三行已圓。若大妄語。則三摩地不得清淨。如刻人糞。為旃檀形。欲求香氣。無有是處。婬殺盜妄。既已消亡。戒定慧學。自然清淨。若太虛之雲散。如大海之波澄。得到這般田地了。方可以參禪。方可以學道。你且道。禪又作麼生參。道又作麼生學。從上以來。多有樣子。福源不惜口嘴。略舉數段。二祖初到少林。參禮達磨。斷臂立雪。悲泣求法。達磨曰。諸佛最初求道。為法忘形。汝今斷臂。求亦可在。二祖曰。諸佛法印。可得聞乎。達磨曰。諸佛法印。匪從人得。二祖曰。我心未安。乞師安心。達磨曰。將心來。為汝安。二祖曰。覓心了不可得。達磨曰。我為汝安心竟。二祖於此悟入。這箇。便是為法忘軀。參禪學道第一樣子。大梅常禪師。參問馬祖。如何是佛。祖曰。即心是佛。常領旨。直入大梅山卓菴。後馬祖聞之。令

僧去問曰。和尚見箇甚麼道理。便住此山。常曰。馬祖向我道。即心是佛。我向這裏住。僧曰。馬祖佛法。如今又別了也。常曰。作麼生別。僧曰。如今又道。非心非佛。常曰。這老漢。惑亂人未有了日在。任他非心非佛。我只管即心即佛。其僧回舉似祖。祖曰。梅子熟也。這箇。便是有決定信。無疑惑心。參禪學道第二箇樣子。臨濟。初在黃蘗會下。行業純一。首座問曰。上座在此多少時也。濟曰。三年。首座曰。曾參問也無。濟曰。不曾參問。不知問箇甚麼。首座曰。汝何不去問堂頭和尚。如何是佛法的大意。濟便去問。聲未絕。蘗便打。如是三度發問。三度被打。濟白座云。幸蒙慈悲。令某問話。三度發問。三度被打。自恨障緣不領深旨。今且辭去。座云。汝若去時。須辭方丈去。座先到方丈云。問話底後生。甚是如法。若來辭時。方便接他。向後成一株大樹。與天下人作陰涼去在。濟去辭。蘗云。不得往別處。向高安灘上大愚處去。濟到大愚。愚問。甚麼處來。濟云。黃蘗處來。愚云。黃蘗有何言句。濟云。某甲三度問佛法的大意。三度被打。不知某甲有過無過。愚云。黃蘗與麼老婆。為汝得徹困。更來這裏問有過無過。濟於言下大悟云。元來黃蘗佛法無多子。愚擲住云。這尿牀鬼子。適來道有過無過。如今却道黃蘗佛法無多子。你見箇甚麼道理。速道速道。濟於大愚肋下築三拳。愚托開云。汝師黃蘗。非干我事。濟辭大愚。却回黃蘗。蘗見來便問。這漢來來去去。有甚麼了期。濟云。祇為老婆心切。蘗問。什麼處去來。濟云。昨蒙慈旨。參大愚去來。蘗云。大愚有何言句。濟遂舉前話。蘗云。作麼生得這漢來待痛與一頓。濟云。說什麼待來。即今便喫。隨後便掌。蘗云。這風顛漢。却來這裏捋虎鬚。濟便喝。蘗云。侍者引這風顛漢。參堂去。這箇。便是宿因深正。有大根器。參禪學道第三箇樣子。長慶稜禪師未悟時。看箇驢事未去馬事到來。如是在雪峰玄沙。往來三十年。坐破蒲團七箇。一日捲簾。豁然大悟。便說箇頌子。道也大差也大差。捲起簾來見天下。有人問我解何宗。拈起拂來劈口打。這箇便是不肯造次承當。必欲見大休大歇田地。參禪學道第四箇樣子。仰山。在百丈會下。問一答十。口吧吧地。百丈曰。汝已後去遇人在。後到瀉山處。瀉問曰。承聞。子在百丈。問一答十。是不。仰云。不敢。瀉云。佛法向上一句。作麼生道。仰擬開口。瀉便喝。如是三問。仰三擬答。三被喝。仰低頭垂淚云。先師道。教我更遇人始得。今日便遇人也。遂發心。看牛三年。一日。瀉山見仰在樹下坐禪。瀉以拄杖點背一下。仰回首。瀉云。寂子道得也未。仰云。雖道不得。且不借別人口。瀉云。寂子會也。這箇。便是去却知解真實。參禪學道第五箇樣子。保寧勇禪師。初入天台教。更衣謁雪竇顯禪師。顯以為堪任大法。乃熟視。呵之。

曰。央庠座主。勇發憤下山。望雪竇山禮拜曰。我此生。行脚參禪。道不過雪竇。誓不歸鄉。便往泐潭踰年。疑情未泮。後參楊岐。頓明心地。岐沒。更從同參白雲端。研極玄奧。這箇。便是具決定志。無退轉心。參禪學道第六箇樣子。雲峰悅禪師。在大愚芝座下。一日芝示眾曰。大家相聚喫莖糞。喚作一莖糞。入地獄如箭。悅聞之駭然。便上方丈請開示。芝曰。法輪未轉。食輪先轉。後生家。趨色力健。何不為眾乞食。我忍饑不暇。何暇為汝說禪乎。悅不敢違。未幾。芝遷翠巖。悅納疏罷。復過翠巖求開示。芝曰。佛法不怕爛却。今正雪寒。可為眾乞炭。悅亦奉命。化炭歸。復上方丈請益。芝曰。堂司即日缺人。今已煩汝。悅受之不樂。恨芝不去心。一日。後架桶籬忽散。自架墮落。豁然大悟。頓見芝用處。急趨方丈。芝見來。笑曰。且喜。維那大事了畢。悅不措一詞。禮拜了退。這箇。便是為眾竭力。不廢寸陰。參禪學道第七箇樣子。更有第八箇樣子。此是微塵佛一路涅槃門。過去諸如來。斯門已成就。現在諸菩薩。今各入圓明。未來修學人。當依如是法。卓拄杖一下。下座。

結制小參。佛祖門風將委地。說著令人心膽碎。扶持全在我兒孫。不料兒孫先作弊。紛紛走北又奔南。昧却正因營雜事。滿目風埃滿面塵。業識茫茫無本據。縱饒挂搭在僧堂。直待板鳴歸被位。聚頭寮舍鼓是非。收足蒲團便瞌睡。癡雲鬢鬣性天昏。石火交煎心鼎沸。暫時寂寂滯輕安。一向冥冥墮無記。百丈清規不肯行。外道經書勤講議。因果分明當等閒。罪福昭然渾不懼。或遷一榻一間房。放逸總由身口意。頭上瓦脚下磚。身上衣口中味。一一皆出信心檀越人家施。未成道業若為消。捫心幾箇知慚愧。今日三明日四。閒處光陰盡虛棄。一朝老病來相尋。閻翁催請死符至。從前所作業不忘。三塗七趣從茲墜。袈裟失却復再難。鱗甲羽毛披則易。看他古之學道流。直忘人世輕名利。煮黃精煨紫芋。飯一搏水一器。為療形枯聊接氣。石爛松枯竟不知。洗心便作累生計。物外清閑一味高。世上黃金何足貴。劫空田地佛華開。香風觸破娘生鼻。選佛場中及第歸。圓覺伽藍恣遊戲。茲因結制夜小參。不覺所言成此偈。福源石屋珙禪師語錄卷之上

山居詩

余山林多暇。瞌睡之餘。偶成偈語自娛。紙墨少便不欲紀之。雲衲禪人請書。蓋。欲知我山中趣向。於是。靜思隨意走筆。不覺盈帙。故掩而歸之。復囑慎勿以此為歌詠之助。當須參意。則有激焉。

吾家住在霽溪西。水滿天湖月滿溪。未到盡驚山險峻。曾來方識路高低。蝸涎素壁粘枯殼。虎過新蹄印雨泥。閒閉柴門春晝永。青桐花發畫胡啼。

柴門雖設未嘗關。閒看幽禽自往還。尺壁易求千丈石。黃金難買一生閒。雪消曉嶂聞寒瀑。葉落秋林見遠山。古栢煙消清晝永。是非不到白雲間。

荒塚纍纍沒野蒿。昔人未葬盡金腰。有求莫若無求好。進步何如退步高。貪餌金鱗終落釜。出籠靈翮便冲霄。山翁不管紅塵事。自種青麻織布袍。

紙窓竹屋槿籬笆。客到蒿湯便當茶。多見清貧長快樂。少聞濁富不驕奢。看經移案就明月。供佛簪瓶折野花。盡說上方兜率好。如何及得老僧家。

道在人弘孰可憑。發言須與行相應。貪心似海何時足。妄念如苗逐日增。幾樹梅花清處士。一園芋子樂間僧。而今隨例菴居者。見道忘山似不曾。

動則乖真靜則差。非思量處更譎訛。無心未合祖師意。有念盡為煩惱魔。矮屋朝陽寒氣少。踈籬種菊晚香多。白雲曳曳方拖練。又被風吹過綠蘿。

松下雙扉冷不扃。一龕金像照青燈。眠雲野鹿驚回夢。落澗獼猴墜折藤。得意看山山轉好。無心合道道相應。多時不向門前去。蘚葉苔花積幾層。

三十餘年住崦西。鑿頭邊事不吾欺。一園春色熟茶笋。數樹秋風老栗梨。山頂月明長嘯夜。水邊雲煖獨行時。舊交多在名場裏。竹戶長開待阿誰。

翠竇丹崖列四傍。茅菴恰好在中央。一身布衲衣裳煖。百念消融歲月忘。石瘦種來蒲葉細。土深迸出笋芽長。有時夜半聞鐘磬。知有招提在下方。

莫謂山居便自由。年無一日不懷憂。竹邊婆子長偷笋。麥裏兒童故放牛。栗蟻地蠶傷菜甲。野猪山鼠食禾頭。施為便有不如意。只得消歸自己休。

菴住霞峰最上頭。巖崖巖嶮少人遊。擔柴出市青苔滑。負米登山白汗流。口體無厭宜節儉。光陰有限莫貪求。老僧不是閒忒怛。只要諸人放下休。

嘯月眠雲二十年。自憐衰老見時艱。烏來索飯生臺立。僧去化糧空鉢還。鰕蜆人爭撈白水。鑿鉏我且斲青山。黃精食盡松花在。不著閒愁方寸間。

幽居自與世相分。苔厚林深草木薰。山色雨晴常得見。市聲朝暮罕曾聞。煮茶瓦竈燒黃葉。補衲巖臺剪白雲。人壽希逢年滿百。利名何苦競趨奔。

入得山來便學呆。尋常有口懶能開。他非莫與他分辨。自過應須自剪裁。瓦竈通紅茶已熟。紙窓生白月初來。古今誰解輕浮世。獨許嚴陵坐釣臺。

溪淺泉清見石沙。屋頭無角寄藤蘿。夜深月下長猿嘯。苔厚巖前少客過。庭竹欹斜春雪重。嶺梅消瘦夜寒多。寥寥此道非今古。徒把甄來石上磨。

白髮禪翁久住菴。衲衣風捲破襪毳。溪邊掃葉供爐竈。霜後苦茆覆橘柑。本有天真非造化。現成公案不須參。豁開戶牖當軒坐。盡日看山不下簾。

臥雲深處不朝天。只在重巖野水邊。竹榻夢回窓有月。砂鍋粥熟竈無煙。萬緣歇盡非除遣。一性圓明本自然。湛若虛空常不動。任他滄海變桑田。

岳頂禪房枕石臺。白雲飛去又飛來。門前瀑布懸空落。屋後山巒起浪堆。素壁淡描三世佛。瓦瓶香浸一枝梅。下方田地雖平坦。難及山家無點埃。

大道從來無盛衰。未明大道著便宜。聖賢隱伏當斯世。邪法流行在此時。痛策諸根休自縱。常存正念莫他為。人身一失袈裟下。萬劫千生不復追。

破屋蕭蕭枕石臺。柴門白日為誰開。名場成隊挨身入。古路無人跨脚來。深夜雪寒唯火伴。五更霜冷只猿哀。袈裟零落難縫補。收捲雲霞自剪裁。

人壽相分一百年。有誰能得百年全。危如茅草郎當屋。險似風波破漏船。流俗沙門真可惜。貪名師德更堪憐。寥寥世道今非昔。日把柴門緊閉關。

綠霧紅霞竹徑深。一菴終日冷沉沉。等閒放下便無事。著意看來還有心。古鏡未磨含萬象。洪鐘纔扣發圓音。本源自性天真佛。非色

非空非古今。

優游靜坐野僧家。飲啄隨緣度歲華。翠竹黃花閒意思。白雲流水淡生涯。石頭莫認山中虎。弓影休疑盞裏蛇。林下不知塵世事。夕陽長見送歸鴉。

滿頭白髮瘦稜層。日用生涯事事能。木臼秋分舂白朮。竹筐春半曬朱藤。黃精就買山前客。紫菜長需海外僧。誰道新年七十七。開池栽藕種芡菱。

卜得重巖遠市朝。柴門半掩草蕭蕭。是誰白髮貧無詔。那箇朱門富不驕。急債莫於寬裏做。妄情須是靜中消。白雲也道青山好。夜夜飛來伴寂寥。

風檣來往塞官塘。站馬如飛日夜忙。冒寵貪榮謀仕宦。貪生重利作經商。人間富貴一時樂。地獄辛酸萬劫長。古往今來無藥治。如何不早去修行。

入此門來學此宗。切須仔細要推窮。清虛體寂理猶在。忖度心忘境自空。樹挂殘雲成片白。山銜落日半邊紅。是風動耶是幡動。不是幡兮不是風。

客愛幽閒到竹籬。逢仰應恕禮全虧。滿頭白髮鬢鬆聚。一頂袈裟撩亂披。黃葉火殘終夜後。青猿聲斷五更時。擁衾相對蒲團坐。各自忘言契此機。

百歲光陰過隙駒。幾人於此審思惟。已躬下事未明白。生死岸頭真嶮巇。衲定線行嬌婦淚。飯香玉粒老農脂。莫言施受無因果。因在果成終有時。

自入山來萬慮澄。平懷一種任騰騰。庭前樹色秋來減。檻外泉聲雨後增。挑薺煮茶延野客。買盆移菊送鄰僧。錦衣玉食公卿子。不及山僧有此情。

是身壽命若浮漚。只好挨排過了休。事欲稱情常不足。人能退步便無憂。衰榮可踰花開落。聚散還同雲去留。我已久忘塵世念。頽然終日倚岑樓。

自覺從前世念輕。老來任運樂閒情。芒鞋竹杖春三月。紙帳梅花夢五更。求佛求仙全妄想。無憂無慮即修行。松風昨夜熾然說。自是聾人不肯聽。

逐日挨排過了休。明朝何必預先憂。死生老病難期約。富貴功名不久留。湖上朱門縈蔓草。澗邊遊徑變荒丘。所言皆是目前事。只是無人肯轉頭。

白髮頭陀老病侵。住來茅屋幾年深。消磨本有凡情執。析蕩今從聖量心。百鳥不來山寂寂。萬松長在碧沉沉。分明空劫那邊事。一道神光自古今。

競利奔名何足誇。清閒獨許野僧家。心田不長無明草。覺苑長開智慧華。黃土坡邊多蕨笋。青苔地上少塵沙。我年三十餘來此。幾度晴窓映落霞。

我本禪宗不會禪。甘休林下度餘年。鶉衣百結通身挂。竹箴三條驀肚纏。山色溪光明祖意。鳥啼花笑悟機緣。有時獨上臺磐石。午夜無雲月一天。

四十餘年獨隱居。不知塵世幾榮枯。夜爐助煖燒松葉。午鉢充饑摘野蔬。坐石看雲閒意思。朝陽補衲靜工夫。有人問我西來意。盡把家私說向渠。

蠶尾狼心滿世間。爭先各自使機關。百年能得幾回笑。一日曾無頃刻閒。車覆有誰知改轍。禍來無地著羞慚。老僧不是多饒舌。要與諸人揭蓋纏。

烏兔奔忙不暫停。巖居忽爾到頽齡。水邊行道影偏瘦。松下看山眸轉青。紅葉旋收供瓦竈。黃花時採插銅瓶。勞生好飲利名酒。昏醉無由喚得醒。

茅屋青山綠水邊。往來年久自相便。數株紅白桃李樹。一片青黃菜麥田。竹榻夜移聽雨坐。紙窓晴啟看雲眠。人生無出清閒好。得到清閒豈偶然。

古人為道入山中。日用工夫在己躬。添石墜腰舂白米。攜鋤帶雨種青松。擔泥拽石何妨道。運水搬柴好用功。驢懶借衣求食者。莫來相伴老禪翁。

萬物生成感宿根。己長彼短不須論。一團猛火利名路。三尺寒冰佛祖門。草莽荆榛狐窟宅。雲霄蓬島鶴乾坤。滿頭白髮居巖谷。幾度凭欄到日曛。

巖居我本為修行。不許人知每自評。道性淳和餘習盡。覺心圓淨照功成。種松鋤菜一身健。補衲翻經兩眼明。世異事殊真好笑。避秦亦得隱山名。

歷遍乾坤沒處尋。偶然得住此山林。茅菴高插雲霄碧。蘚徑斜過竹樹深。人為利名驚寵辱。我因禪寂老光陰。蒼松恠石無人識。猶更將心去覓心。

年老心閒身亦閒。掃除一榻臥松間。巖扃幽寂自為喜。世路崎嶇人轉頑。風煖野禽聲瑣碎。日斜華藥影闌珊。藜羹粟飯家常有。不用持盂更下山。

清晨汲水啟柴門。看見天空四斂氛。黃獨火香思懶攢。碧桃花謝悟靈雲。林間猿鶴慣曾見。世上衰榮杳不聞。幾度坐來苔石煖。好山直看到斜曛。

白雲深處結茅廬。隨分生涯樂有餘。未死且留煨芋火。息機何必絕交書。湛然凝寂通三際。廓爾圓明裊十虛。菴內不知菴外事。幾番



花落又還敷。

細把浮生物理推。輸贏難定一盤碁。僧居青嶂閒方好。人在紅塵老不知。風颺茶煙浮竹榻。水流花瓣落青池。如何三萬六千日。不放身心靜片時。

恁麼徹底恁麼去。放下從頭放下來。兩片唇皮堆白醜。一條古路長蒼苔。雲邊木馬飛如電。海底泥牛吼似雷。雪覆萬峯晴月夜。暗香春信到寒梅。

清貧長樂道人家。日用頭頭自偶諧。昨夜西風吹古木。天明滿地是乾柴。霞飄素煉粘丹壁。露滴真珠綴綠崖。活計從來隨現定。不勞辛苦去安排。

了了常知似不知。翛然如兀又如癡。旋乾倒嶽鎮長靜。一念萬年終不移。有耳聽聲風過樹。無心應物月臨池。休言我獨能明了。此事人人盡可為。

計拙慙虧應世才。聰明無分占癡呆。自言境物皆虛幻。誰解資財盡倘來。黃葉隨流閒去住。白雲橫谷謾徘徊。雙眸合却方纔好。為愛青山又放開。

圓顱方服作沙門。便見牟尼佛子孫。止惡防非調意馬。忘機息見制心猿。鍊魔道性真金淨。涵養靈源美玉溫。把手牽他行不得。為人自肯乃方親。

紅日東升夜落西。黃昏鐘了五更雞。乾坤老我一頭雪。歲月消磨百甕壺。借地栽松將作棟。喫桃吐核又成蹊。寄言世上傷弓羽。好向深山擇木棲。

法道寥寥不可模。一菴深隱是良圖。門前養竹高遮屋。石上分泉直到厨。猿抱子來峩果熟。鶴移巢去磳松枯。禪邊大有閑情緒。收拾乾柴向地爐。

浮世光陰有幾何。誰能挈挈又波波。厨空旋去尋黃獨。衲破方思剪綠荷。塵尾罷拈言語斷。佛經忘看蠹魚多。可憐身在袈裟下。趣境攀緣事似麻。

## 五言律詩

道人緣慮盡。觸目是心光。何處碧桃謝。滿溪流水香。草深蛇性悅。日煖蝶心狂。曾見樵翁說。雲邊雪畫房。

一履足生涯。居山道者家。有功惟種竹。無暇莫栽華。水碓夜舂米。竹籠春焙茶。人間在何處。隱隱見桑麻。

時時自解顏。年老得安閒。心下渾無事。眼前惟有山。天空鵬翥翼。霧重豹添斑。獨與梅花好。相期盡歲寒。

萬緣休歇罷。一念絕中邊。盡日閒閒地。長年坦坦然。山空雲自在。天淨月孤圓。磨煉工夫到。難同知解禪。  
巖臺舒野望。依約見松門。唐代高僧寺。宋朝丞相墳。溪光晴瀉遠。野色晚來昏。山路歌聲絕。樵歸煙火村。  
屈曲黃泥路。團圓紫槿籬。紙窗開竹屋。瓦竈爇松枝。平澹忘懷處。蕭然絕照時。何人能似我。無事亦無為。  
深山僧住處。端的勝蓬萊。地上並無草。園中却有梅。閒多諸想滅。靜極自心開。一頂破禪衲。和雲曬石臺。  
一陣從何起。颼颼徧九垓。[打-丁+感]他林木動。吹我竹門開。本自無形段。如何有去來。欲窮窮不到。一虎笑巖臺。  
霞霧山頭頂。雲邊闕小房。夏涼窓近竹。冬煖閣朝陽。繭紙衣裳軟。山田粥飯香。此生隨分過。無可得思量。  
一履足生涯。長年飽水柴。有山堪寓目。無事可干懷。嵐氣濕茅屋。苔痕上土堦。任緣終省力。渾不用安排。  
山厨修午供。泉白似銀漿。羹熟筍鞭爛。飯炊粳米香。油煎清頂蕈。醋煮紫芽薑。百味皆難及。何須說上方。  
真空如湛海。微動即成漚。纔受形骸報。便懷衣食憂。識情奔野馬。妄念走狂猴。不悟空王旨。輪迴卒未休。  
山家八月天。時物自相便。荳莢新垂隴。稻花香滿田。割茅修舊屋。斫竹覓清泉。世上誰知我。優游樂晚年。  
茆菴竹樹間。塵世不相關。門對一池水。窓開四面山。煙熏茶竈黑。塵蒸布裘斑。不悟空王法。緣何得此閒。  
紅日半銜山。柴門便掩關。綠蒲眠褥軟。白木枕頭彎。松月來先照。溪雲出未還。迢迢清夜夢。不肯到人間。  
扶杖出松林。間行上翠岑。鶴羣衝鶻散。樹影落溪沉。野果棘難採。藥苗香易尋。澹烟斜日暮。紅葉半巖陰。  
好山千萬疊。屋占最高層。減塑三尊佛。長明一碗燈。鐘敲寒夜月。茶煮石池冰。客問西來意。惟言我不能。  
取捨與行藏。人生各有方。乾坤容我懶。名利使他忙。背日鷗眠埠。營窠燕遶梁。情迷隨物轉。不得悟空王。  
結草便為菴。年年用覆苫。紙窓松葉暗。竹屋蘚華粘。麥飯惟饒火。藜羹不點鹽。生涯隨分過。誰管世人嫌。

### 七言絕句

淒淒茅舍新秋夜。白荳花開絡緯啼。山月如銀牽老與。閒行不覺過峰西。

滿山筍蕨滿園茶。一樹紅花間白花。大抵四時春最好。就中猶好是山家。  
有人問我何年住。坐久纔方省得來。門外碧桃親手種。春光二十度花開。  
厭煩勞役愛安閒。箇樣如何居得山。百丈已前巖穴士。生涯全在鑿頭邊。  
年老菴居養病身。日高猶自未開門。怕寒起坐燒松火。一曲樵歌隔塢聞。  
童子未曾歸動火。水雲早已到投齋。山菴喜免征徭慮。賸種青松只賣柴。  
玉堂銀燭笙歌夜。金谷羅幃富貴家。爭似道人茅屋下。一天晴月曬梅花。  
相逢盡說世途難。自向菴中討不安。除却淵明賦歸去。更無一箇肯休官。  
山厨寂寂斷炊煙。凍鎖泉聲欲雪天。面壁老僧無定力。又思乞食到人間。  
種了冬瓜便種茄。勞形苦骨做生涯。眾人若要厨堂好。須是園頭常在家。  
粥去飯來何日了。日生日落幾時休。都來與我無干涉。空起許多閒念頭。  
屋後青松八九樹。門前紫芋兩三隣。山居道者機關少。家火從頭說向人。  
此事誰人敢強為。除非知有莫能知。分明月在梅花上。看到梅花早已遲。  
過去事已過去了。未來不必預思量。只今便道即今句。梅子熟時梔子香。  
一日打眠三五度。也消不得許多閒。循環數遍琅玕竹。又出青松望遠山。  
攀緣起倒易消停。卒急難除是愛憎。我笑青山高突兀。青山嫌我廋陵層。  
真空湛寂惟常在。不覺良田妄所朦。真性何曾離妄有。花開花落自春風。  
天湖水湛琉璃碧。霞霧山圍錦幃紅。觸日本來成現事。何須叉手問禪翁。  
年老氣衰真箇懶。晨朝更不見和南。客來無語相抵對。辛苦空勞到草菴。  
老去一身都是懶。閑來百念盡成灰。與兄相見略彈指。無柰人情強接陪。

田地無塵長不掃。柴門有客扣方開。雪晴斜月侵簷冷。梅影一枝窓上來。  
茅屋低低三兩間。團團環遶盡青山。竹牀不許閒雲宿。日未斜時便掩關。  
禪兄何事到煙蘿。老我生涯苦不多。巖下木樨香滿樹。園中菜甲綠成窠。  
一片無塵新雨地。半邊有蘚古時松。目前景物人皆見。取用誰知各不同。  
萬境萬機俱寢息。一知一見盡消融。閒閒兩耳全無用。坐到晨雞與暮鐘。  
巖房終日寂寥寥。世念何曾有一毫。雖著衣裳喫粥飯。恰如死了未曾燒。  
新縫紙被烘來煖。一覺安眠到五更。聞得上方鐘鼓動。又添一日在浮生。  
門前枯木似人立。屋後好山如浪堆。老我為人無可說。高高雲路賺兄來。  
山形凹凸路高低。石占雲頭屋占蹊。地窄栽來蔬菜少。又營小圃在橋西。  
百千日月閒中度。八萬塵勞靜處消。綠水光中山影轉。紅爐焰上雪花飄。  
西方有路不肯去。地獄無門鬪要過。金閣銀臺仙子小。鑊湯爐炭罪人多。  
著意求真真轉遠。擬心斷妄妄猶多。道人一種平懷處。月在青天影在波。  
要求作佛真箇易。唯斷妄心真箇難。幾度霜天明月夜。坐來覺得五更寒。  
萬緣脫去心無事。諸有空來性坦然。幾度夜窓虛吐白。月和流水到門前。  
一事無心萬事休。也無歡喜也無憂。無心莫謂便無事。尚有無心箇念頭。  
於事無心風過樹。於心無事月行空。風聲月色消磨盡。去却一重還一重。  
新年頭了舊年尾。明日四兮今日三。道業未成空白首。大千無處著羞慚。  
白髮催人瘦入肩。住來茅屋已多年。褪無腰帶袴無口。一領褊衫沒半邊。  
一軸楞伽看未周。夕陽斜影水東流。雲歸自就茅簷宿。一日光陰又早休。

茅簷雨過日頭紅。瞬息陰晴便不同。況是死生呼吸事。黃昏難保聽朝鐘。  
明明見了非他見。了了常知無別知。記得去秋烟雨裏。猿來偷去一雙梨。  
半窓松影半窓月。一箇蒲團一箇僧。盤膝坐來中夜後。飛蛾撲滅佛前燈。  
長年心裏渾無事。每日菴中樂有餘。飯罷濃煎茶喫了。池邊坐石數游魚。  
飯炊五合陳黃米。羹煮數莖青薺苗。淡薄自然滋味好。何須更要著薑椒。  
移家深入亂峯西。烟樹重重隔遠溪。年老心閒貪睡穩。獸聞鐘響與雞啼。  
山風吹破故窓紙。片片雪花飛入來。添盡布裘渾不煖。拾枯深撥地爐灰。  
半窓斜日冷生光。破衲蒙頭坐竹床。枯葉滿爐燒焰火。不知屋上有寒霜。  
幾樹山花紅灼灼。一池春水綠漪漪。衲僧若具超宗眼。不待無情為發機。  
雲未歸時便掩扃。柴床眠穩思冥冥。山家不養雞和犬。日到茅簷夢未醒。  
粥去飯來茶喫了。開窓獨坐看青山。細推百億閻浮界。白日無人似我閒。  
黑霧濃雲撥不開。忽然去了忽然來。任他伎倆自磨滅。紅日依前照石臺。  
一天紅日曉東南。自拔青苗插瘦田。布襪半沾泥水濕。歸來脫曬竹房前。  
喫桃吐核核成樹。樹大花開又結桃。春去秋來知幾度。爭教我不白頭毛。  
茅屋方方一丈慳。四簷松竹四圍山。老僧自住尚狹窄。那許雲來借半間。  
臨機切莫避刀鎗。[拚-厶+去]死和他戰一場。打得趙州關子破。大千無處不歸降。  
有限光陰一百年。幾人得到百年全。縱饒百歲終歸死。只是相分後與前。  
一大藏經閒故紙。一千七百葛藤窠。誰能去討他分曉。起箇念頭猶是多。  
溪邊黃葉水去住。嶺上白雲風往來。爭似老僧常不動。長年無事坐巖臺。

霞霧山高路又遙。菴居從藺蔑三條。却嫌住處太危險。落賺多人登陟勞。  
老覺形枯氣力衰。客來勉強出支陪。自憐不解藏踪跡。松食荷衣憶大梅。  
道人屋冷四簷竹。長者門高百尺墻。屋冷道人心愈靜。門高長者日多忙。  
盡道凡心非佛性。我言佛性即凡心。工夫只怕無人做。鐵杵磨教作線針。  
南北東西去復還。陸行車馬水行船。利名門路如天遠。走殺世間人萬千。  
居山那得有工夫。種了冬瓜便種瓠。設使一毫功不及。許多田地盡荒蕪。  
離眾多年無坐具。入山長久沒袈裟。單單有箇鐵鐺子。留待人來煮瀑花。  
布衣破綻種青麻。糧食無時刈早禾。辛苦做來牽補過。復身免得報檀那。  
飯香麥麩和松粉。菜好藤花雜筍鞭。我已盡形無別念。任他作佛與生天。  
山居活計鑿頭邊。衣食須營豈自然。種稻下田泥沒膝。賣柴出市檐磨肩。  
鑿頭添鐵屋頭懸。健即鋤雲倦即眠。紅日正中黃獨熟。甘香不在火爐邊。  
團團一箇尖頭屋。外面誰知裏面寬。世界大千都著了。尚餘閒地放蒲團。  
草菴盤結長松下。面面軒窓盡豁開。目對青山終日坐。更無一事上心來。  
深秋時節雨霏霏。蘚葉層層印虎蹄。一夜西風吹不住。曉來黃葉與階齊。  
團團紅日上青山。竹屋柴門尚閉關。白髮老僧眠未起。勞生磨蟻正循環。  
山舍清幽絕點塵。心閒與世自相分。不知何處碧桃放。幽鳥銜來遶竹門。  
老來無事可千懷。竹榻高眠日枕斜。夢裏不知誰是我。覺來新月到梅花。  
禪餘高誦寒山偈。飯後濃煎谷雨茶。尚有閒情無著處。携籃過嶺採藤花。  
僧因產業致差科。官府勾追恥辱多。我有山田三畝半。盡情回付與檀那。

楮閣安爐種炭團。床鋪新薦被新棉。一冬暖活如何說。夢想不思兜率天。  
去年家火缺支持。家火今年用不虧。田裏多收三斗穀。門前添得一方池。  
白雲影裏尖頭屋。黃葉堆頭折脚鐺。漏筮籬撩無米飯。破砂盆擣爛生薑。  
修行豈得不成佛。水滴年深石也穿。不是頑皮鑽不破。惟人只欠自心堅。  
獨坐窮心寂杳冥。箇中無法可當情。西風吹盡擁門葉。留得空堦與月明。  
玉蝶梅花香滿樹。水池洗菜綠浮科。錦衣公子如知得。定是移家人薜蘿。  
逆順未嘗忘此道。窮通一味信前緣。是他了達虛空性。不動纖毫本自然。  
寒披荷葉衣裳暖。饑食松華餅餌香。不比世人營口體。奔南走北一生忙。  
新縫紙被暖烘烘。黃葉堆頭火正紅。閒夢不知誰喚醒。五更聽得下方鐘。  
旋斫青柴逐把挑。擔頭防脫莫過腰。今朝未保來朝日。且了寒爐一夜燒。  
今年難測是寒暄。一日陰晴變幾番。簷下紙窓乾又濕。門前石徑濕還乾。  
峰頂團團盡是松。茅廬著在樹陰中。天風一陣來何處。吹起波濤響半空。  
黃羅直裰紫伽梨。出入侯門得意時。爭似道人忘寵辱。松針柳線補荷衣。  
春歸暑退一秋涼。日晷如梭夜漸長。盡把工夫閒雜話。幾曾回首暫思量。  
我見時人日夜忙。廣營屋宅置田莊。到頭一事將不去。獨有骷髏葬北邙。  
箇箇聞知有死生。聞知何不早修行。堂堂大道無人到。開眼明明入火坑。  
盡說修行不在遲。今生還有後生期。三塗一報五千劫。出得頭來是幾時。

## 歌

山名霞幕泉天湖。卜居記得王子初。山頭有塊臺磐石。宛如出水青芙蕖。更有天湖一泉水。先天至今何曾枯。就泉結屋擬終老。田地一點紅塵無。外面規模似狹窄。中間取用能寬舒。碧紗如煙隔金像。雕盤沉水凌天衢。蒲團禪椅列左右。香鐘雲板鳴朝晡。甃罌土種吉祥草。石盆水養龍湫蒲。飯香粥滑山田米。瓜甜菜嫩家園蔬。得失是非都放却。經行坐臥無相拘。有時把柄白塵拂。有時持串烏木珠。有時歡喜身舞蹈。有時默坐觜盧都。懶舉西來祖意。說甚東魯詩書。自亦不知是凡是聖。他豈能識是牛是驢。客來未暇陪說話。拾枯先去燒茶爐。紅香旖旎。春華開敷。清陰繁茂。夏木翳如。巖桂風前喚回山谷。梅花雪裏清殺林逋。人間無此真樂。山中有甚凶虞。也不樂他輕輿高蓋。也不樂他率眾匡徒。也不樂他西方極樂。也不樂他天上淨居。心下常無不足。目前觸事有餘。夜籟合樂。曉天昇烏。戲魚翻躍。好鳥相呼。路通玄以幽遠。境超世而清虛。騷人盡思吟不成句。丹青極巧畫不成圖。獨有淵明可起予。解道吾亦愛吾廬。山中居沒閒時。無人會惟自知。遶山驅竹筧寒水。擊石取火延朝炊。香粳旋舂柴旋斫。砂鍋未滾涎先垂。開畚未及種紫芋。鋤地更要栽黃箕。白日不得手脚住。黃昏未到神思疲。歸來洗足上床睡。困重不知山月移。隔林幽鳥忽喚醒。一團紅日懸松枝。今日明日也如是。來年後年還如斯。春草離離。夏木葳葳。秋雲片片。冬雪霏霏。虛空落地須彌碎。三世如來脫垢衣。晴明無爭登霞峰。伸眉望極開心胸。太湖萬頃白[汾\*欠]灩。洞庭兩點青濛茸。初疑仙子始綰角。碧紗帽子參差籠。又疑天女來獻花。玉盤捧出雙芙蓉。明知此境俱幻妄。對此悠然心未終。徘徊不忍便歸去。夕陽又轉山頭松。乾鵲傍簷鳴鵲喙。烏鴉遶屋聲鴉啞。西菴道者來送果。東鄰稚子去偷瓜。吉凶占相既有驗。罪福果報應無差。道人若有此見解。青銅鏡面生痕瑕。懶融一見四祖後。百鳥更不來銜花。林木長新葉。遶屋清陰多。深草沒塵跡。隔山聽樵歌。自畊還自種。側笠披青簑。好雨及時來。活我新栽禾。遊日周宇宙。物物皆消磨。既善解空理。不樂還如何。寒山曾有言。吾心似秋月。我亦曾有言。吾心勝秋月。秋月非不明。有圓復有缺。安得如我心。圓明常皎潔。有問心如何。教我如何說。月來照我門。風來吹我襟。勸君石上坐。聽我山中吟。玄鬢化為雪。朝光成夕陰。萬事草頭露。豈得長如今。飯飽抱石睡。睡足起閒行。靄靄孟夏景。新樹鳴黃鶯。俯仰玩時物。散誕暢吟情。只此是真樂。何必求虛名。



小不讀佛書。大不識玄旨。焉知百萬門。只在方寸裏。終日恣貪  
嗔。幾時念生死。一朝老病來。懊惱亦徒爾。  
種豆兩三畦。離離覆原上。不知陽和功。惟言土力壯。老兔伏崖  
根。心心欲希望。果能息汝貪。我寧不食醬。  
山中一雨滋。原上百物好。手種三畝薯。亦可延昏早。咄哉世間  
人。名利常關抱。頭上雪紛紛。胸中塵浩浩。  
結屋荒山巔。隨緣度朝夕。賣柴糶米歸。煮粥做飯喫。雖是勞形  
骸。且免當戶役。說妙與談玄。箇却曉不得。  
放下全放下。佛也莫要做。動念即成魔。開口便招禍。飲啄但隨  
緣。只麼閒閒過。執法去修行。牽牛來拽磨。  
破屋三兩椽。住在千峰上。雲散天空清。放目聊四望。世界空裏  
花。起滅皆虛妄。日落山風寒。閉門燒火向。  
結屋霞峰頭。耕鋤供日課。山田六七坵。道人二兩箇。開池放月  
來。賣柴糶米過。老子少機關。家私都說破。  
兩箇窮道人。三間弊漏屋。開得一坵田。收得半擔穀。煮粥儘有  
餘。做飯却不足。也勝利名人。奔南又走北。

## 偈讚

### 示眾偈

說是說非何日了。無明海濶我山高。修身如未清三惑。凡事須當減  
一毫。閒靜光陰空過了。現成粥飯若為消。慇懃說向諸禪客。莫把  
袈裟換羽毛。

### 送東林院主歸華亭

參禪人須猛烈。吹毛劍白雪雪。佛來與祖來。拈起當頭截。雲中木  
馬驚嘶。山上鯉魚出血。萬仞崖頭奏凱歸。等閒踏破華亭月。

### 送慶侍者回里省師

汝師年老中山寺。朝暮無人可瞻侍。不歸掃灑執巾瓶。師資禮法合  
也未。汝母兼又年紀高。除汝一人更無二。望斷秋風未見歸。倚門  
日日長垂淚。離師棄母入山來。所圖畢竟成何事。安貧樂道固所  
難。住箇茆菴豈容易。也要種竹栽松。也要鋤山掘地。也要運水搬  
柴。也要澆蔬灌芋。也要行道諷經。也要攝心除睡。藜羹黍飯塞饑  
瘡。淡齏薄粥通腸胃。人生皆為口體忙。我亦未免形骸累。自家心

地如未明。業識茫茫無本據。水邊林下暫經過。吾汝皆非久居計。  
月江和尚有書來。勉汝歸來有深意。開緘未讀便抽身。不負來音全  
孝義。有言孝為百行先。在俗在僧誰不然。侍師奉母名敬田。何須  
入眾并參禪。忽然思靜又嫌喧。短策不妨閒往還。

### 海都寺求語

急急做工夫。單提狗子無。脊梁高豎起。屹似須彌盧。翻來覆去  
看。要了此公案。瞥然妄念生。便逐他使喚。精進不懈怠。坐立道  
可待。懶惰又昏沉。驢年也未在。若也放得下。無可無不可。千七  
百葛藤。盡是敲門瓦。

### 留進菴主

丹陽進禪人。隨我住有日。雖立志參禪。未曾有所入。菴中諸事  
務。渾不憚勞役。口體甘淡薄。身心頗真實。一朝拜我前。請語為  
法則。我寫此數言。助汝進道力。只就我山居。隨緣度朝夕。莫學  
野盤僧。東西與南北。尋常動用中。精進莫放逸。剔起眉毛看。畢  
竟是何物。看破看的人。大事方了畢。

### 示居士劉鐵壁

見性成佛無別佛。古人說話最條直。當頭坐斷沒纖毫。切忌隨他言  
語覓。縱饒虛妄百千般。究竟還歸一真實。老僧吐露真實情。寄與  
雲間劉鐵壁。

### 山中四威儀

山中行。信步慢騰騰。攀蘿去。又上一峻嶒。  
山中住。幾度朝還暮。手栽松。陰涼成大樹。  
山中坐。飄飄黃葉墮。沒人來。閉門燒焰火。  
山中臥。松風穿耳過。沒來由。好夢都吹破。

### 重巖之下十首

重巖之下。火種刀耕。有粟有蔬。可煮可烹。了我目前。樂我餘  
生。坐盼庭柯。幾度衰榮。

重巖之下。希古為儔。徹證本根。一了便休。紛紛玄徒。念死話頭。待兔守株。求劍刻舟。  
重巖之下。草莽日交。人影不來。黃葉飄飄。谷鳥晚啼。山月夜高。松露鶴飛。濕我禪袍。  
重巖之下。蛇虎為鄰。我心既忘。彼性亦馴。人生在世。各具天真。含齒戴髮。胡為不仁。  
重巖之下。未透本根。觸境逢緣。擾擾紛紛。應須悟理。超越見聞。久久自然。左右逢原。  
重巖之下。靜默自居。三際不來。心如鏡如。斜月半窗。殘火一爐。嗟彼睡夫。蝶夢蘧蘧。  
重巖之下。皤然一叟。褊兮無邊。袴兮無口。夜入禪那。晝勤隴畝。道在其中。別更何有。  
重巖之下。目對千山。一根返源。六處皆閒。白雲飄飄。綠水潺潺。動靜自忘。別是人間。  
重巖之下。不修形骸。木食草衣。布襪筍鞋。竹密暗窗。苔深覆堦。蕭焉忘情。寂爾虛懷。  
重巖之下。飽飯熟眠。縱情放逸。歲月虛延。老病時臨。眾苦交煎。臨渴掘井。熱悶徒然。

### 次韻送智西堂歸靈隱

一榻平分鑑古軒。爐熏相對坐忘眠。山林禮樂無今昔。時節因緣有變遷。樹影高低深夜月。猿聲長短五更天。兩冬不得梅花信。又約梅華到冷泉。

### 會趙初心提舉

老來脚力不勝鞋。竹杖扶行步落華。待月伴雲眠蘚石。尋梅陪客過隣家。粥香瓦鉢山田米。雪汎瓷甌水磨茶。今日為翁時暫出。此心長只在烟霞。

### 別南山經室

屋借雲邊兩載居。晴原無事便携鉏。和香採得隣家菊。趁嫩挑來自種蔬。秋殿寂時山磬歇。夜窗虛處柏烟疎。明朝又向他山去。何日重來讀梵書。

### 秋日秦川道中

處處西風葉落頻。偶歸湖寺覓容身。故人十有幾人在。世事萬無一事真。擾擾勞生同作夢。明明果報各由因。余諳此理能消遣。終不隨他自損神。

### 偶作

今年七十七頹齡。血氣潛消老病增。踏雪探梅知履重。挑雲過嶺覺肩疼。光陰別去忙如箭。世念消來冷似冰。却憶向時遊岳洞。兩三回上最高層。

### 冬至

昨宵冬至一陽生。萬物欣欣盡向榮。鐵樹華開紅朵朵。石田筍出綠莖莖。人間化日纔添線。竹外幽禽便轉聲。白髮老僧窻下坐。爐香多誦兩行經。

### 却南州提舉再招

自嗟業繫在娑婆。一度尋思一嘆嗟。世上多逢人面虎。山中少見佛心蛇。禦寒補衲裁荷葉。遣睡煎茶煮瀑華。老拙背時耐應懶。不能從命出烟霞。

### 雪中示徒

六出飄飄入夜多。灑窓相似撲燈蛾。山家富貴銀千樹。漁父風流玉一蓑。深徑絕無樵子語。陰崖却有獵人過。菴前黃獨無尋處。唯見寒梅數朵華。

### 送臯侍者

侍者參得禪了也。萬兩黃金也合消。世上豈無千里馬。人間難得九方臯。

### 送漆匠

裏面盡情灰得了。外頭方始好揩磨。雖然本有靈光在。也要工夫發用他。

### 送真藏主禮育王

鴈蕩天台華頂峰。鄮山乳竇接天童。徧遊元不離雙足。盡在摩尼一點中。

### 送就禪人禮祖

人人有具黃金骨。何必諸方禮塔頭。堪笑丹陽就禪者。春深物自浙東遊。

### 送松江深上人

參方禮祖外邊事。一著工夫在己躬。親覲阿師秋已半。樹彫葉落露金風。

### 送椿上人禮普陀

寒潮日夜吼雷音。耳聽何如眼聽親。小白華巖觀自在。頻伽聲裏現全身。

### 示禪上人

古今無法可傳流。只要偷心死便休。大抵是他人自肯。福源不會按牛頭。

### 送雪峯維那

留香堂裏十聲佛。驚倒江西馬簸箕。八十四人扶不起。維那歸去莫教遲。

### 送人遊五臺

去去臺山最上層。文殊合掌咲相迎。巖前有箇金獅子。顛倒騎歸與老僧。

### 送針工

手携刀尺走諸方。線去針來日日忙。量盡別人長與短。自家長短幾曾量。

### 示真副寺坐圓覺期

百日期中痛著鞭。工夫到處話頭圓。多生業障俱消滅。佛境分明在目前。

### 送實監寺回大覺

楊岐骨格氣雄雄。一夏相忘寂寞中。秋至思歸天日去。竹房閒掩聽松風。

### 送愆上人回鄉

孤身行脚緣何事。策杖歸鄉有底忙。白業不修禪不會。可憐空過好時光。

### 送德都寺回里

德雲不在妙峯頂。却向別山相見來。從此罷休行脚念。坐看心地覺華開。

### 送真侍者

幾年入眾為參禪。三喚機緣未倒邊。再去諸方重請益。却來這裏喫麪拳。

### 送福上人禮祖

祖師塔是鶻崙磚。只在山邊與水邊。一一從頭巡禮徧。草鞋依舊自還錢。

### 示來上人

看水看山何日了。奔南走北幾時休。可憐身在袈裟下。道業未成先白頭。

### 送淨髮待詔二首

結緣待詔到山中。廊下諸僧盡整容。方丈老人何不剃。要留白髮過隆冬。

又

剃了又長長又剃。一年幾度遠煩過。大夫只管來求福。我福如何有許多。

### 送圓上人

妙淨圓明全體現。不須來問我如何。正因行脚禪和子。知解何曾有許多。

### 送問上人歸大乘

一句明明向汝道。冷如猛火熱如冰。上人若不信我說。急急回歸問大乘。

### 送人之五臺

短策輕包上五臺。銀樓金閣正門開。文殊相見喫茶了。收取玻瓈盞子來。

### 送門上人

夏在大乘堂裏住。冬初來扣福源門。莫嫌老我無言說。一曲漁歌隔岸聞。

### 送明道者

工夫不到不方圓。心若堅時石也穿。不見頭陀老迦葉。意根滅盡領金襴。

### 送大維那省母

桶籬爆處見根源。熟路重行三月天。日暖北堂萱草綠。對娘莫說老婆禪。

### 示茂道者

作佛生天容易事。最難難是做頭陀。勞形枯骨安閒少。運水搬柴普請多。

### 示道人

自遠相尋到鵝湖。慇懃請問做工夫。老僧真實為人說。出處伽陀一字無。

### 送勤上人

勤求警策做工夫。散亂昏沉盡掃除。後夜黑雲消散盡。長天如水月輪孤。

### 示禪人二首

終日騎牛不識牛。何須辛苦外邊求。只消驀鼻牽來看。便是尋常這一頭。  
參得趙州無字透。玄關金鎖盡開通。三更月下泥牛吼。八面玲瓏海日紅。

### 英上人求語

客冒春寒訪隱扃。衲衣猶綴雪華輕。坐來出示諸方語。錦軸未開先眼明。

### 送維那之江西

上人壯志出叢林。一寸光陰一寸金。莫把世間閒學解。等閒埋沒祖師心。

### 送凌侍者回淨慈



十里湖光浸六橋。到時須著眼頭高。斷堤風暖楊華落。不是鳥窠吹布毛。

### 送觀侍者

放下身心返自觀。略無毫髮許相瞞。雲收霧捲乾坤闊。月上青山玉一團。

### 示勒道者

一片荒田一把鋤。翻來覆去用工夫。一鋤翻得春風轉。也有瓜茄也有瓠。

### 示眾

念未生時猶妄覺。瞥興一念便傷他。工夫到此切須記。枯木巖前蹉路多。

### 示道者

行盡東西南北州。如今能得此心休。俱胝只在中山住。受用天龍一指頭。

### 跋淨首座血書法華報親

父是誰兮母是誰。胸中五逆是男兒。看他義斷情忘處。菡萏華開三四枝。

### 常侍者血書金剛經

此經在處皆有佛。不勞心力更施功。祇園秋晚霜華重。樹葉紅於血染濃。

### 寄魁書記

僧住城隍佛祖訶。先賢多是隱巖阿。山泉流出人間去。清水自然成濁波。

### 寄淨慈平山和尚

年老心孤憶弟兄。中峯且喜過南屏。潺潺一派雙溪水。流入西湖更好聽。  
領破蹄穿五百牛。南屏寺裏一欄收。皮毛換得光生也。拽杷拖犁再起頭。

### 寄友二首

山舍無聊夜臥遲。因君記得去年時。豆華棚下曾分榻。月落松梢尚詠詩。  
萬松影裏三間屋。枯木巖前一箇僧。三二十年如此過。肯將清淡換虛名。

### 贈古樵

空劫已前無影樹。撐天拄地赤條條。新州有箇賣柴漢。收拾將來一擔挑。

### 贈無岸

舉頭四望白瀾瀾。南北東西竟莫知。不用篙篙撐到底。回頭便是上船時。

### 贈本源

滔滔心地中流出。低下隨宜不自高。坎止流行皆末事。終歸大海作波濤。

### 贈石崖

千尋拔地青如玉。萬丈凌雲硬似剛。望見嶮巖多退步。有誰撒手肯承當。

### 贈無敵

眼空湖海氣凌雲。傑出叢林思不群。古往今來誰是我。得饒人處且饒人。

### 贈白庵

一色虛明合法界。四簷皎潔若冰霜。小窻幾度雪晴夜。不見梅華只覺香。

### 贈別澗

湛然不入眾流數。瞪目觀來果必殊。但得煮茶增味好。誰能泛濫落江湖。

### 贈別峯

峭峻萬峯齊不得。孤危眾嶽勢難同。善財參見得雲處。又在那邊蒼翠中。

### 真讚出山佛二首

頭髮鬢鬆下翠微。凍雲殘雪綴伽梨。不須更問山中事。觀著容顏便得知。  
肘破衣穿骨裹皮。下山回首步遲遲。父王休遣人來問。顏貌不如宮裏時。

### 觀音大士二首

童子南詢尚未回。白華巖下望多時。長天萬里無雲夜。月在波心說向誰。  
水即是波。巖即是石。坐證圓通。斯為第一。

### 羅漢二首

一切不為。長年打坐。執法修行。如牛拽磨。寂滅現前不見前。待出定來重勘過。  
一個渾身。一瓶秋水。物外生涯。只這便是。白眼看他世上人。手捺雙趺笑而已。

### 達磨二首

面黑齒缺。心羸膽大。梁王殿上。撒沙拋土。少室峰前。開華結果。槲葉巖臺。蒙頭宴坐。夫是謂之菩提達磨。一言不契渡江淮。熊耳峰前去活埋。無限家私狼藉盡。何爭一隻破皮鞋。

### 讚及菴和尚并師同幀

二老比丘。有何因由。先覺後覺。東州西州。建陽山中相見時。好於骨肉。西峰寺裏再參後。惡似冤讎。從此父南子北。不知雲散水流。在你也報盡已歸兜率。在我也業煩尚寄閻浮。是非恩怨難分處。一片松陰蓋石頭。

### 自讚

板齒生毛。面孔無肉。受靈山記。欠人天福。瘦稜稜。却如碧海波心湧起一座玉巖。硬剝剝。好似白雲堆裏突出千尋石屋。道是天湖菴主。不是我同流。謂是福源住持。亦非吾眷屬。眼裏無筋底。未免向影子上胡猜亂猜。皮下有血底。終不向丹青上東卜西卜。咦。切須莫展與人看。挂向閒房伴松竹。

### 禪人求讚

髮白面皺。皮黃骨瘦。用盡自己心。笑破他人口。情知衰世道難行。却來靜處閒叉手。看天湖鵝湖二水同流。對霞峰胥峰兩山並秀。何緣得此優游。端的自能跳透。不是禪翁自點胷。古今盡道蘇州有。

### 辭世偈

青山不著鼻尸骸。死了何須掘土埋。顧我也無三昧火。光前絕後一堆柴。

石屋和尚語錄卷下(終)

No. 1399-C 福源石屋珙禪師塔銘

前四明延壽禪寺沙門 元旭 譔

師。諱清珙。字石屋。蘇之常熟人也。俗姓溫。母劉氏。生之夕有異光。實宋咸淳八年壬申也。及長。依本州興教崇福寺僧永惟出家。二十祝髮。越三年受具。一日有僧杖笠過門。師問之。僧曰。吾今登天目。見高峰和尚。汝可偕行否。師欣然與之偕行見峰。峰問。汝為何來。師曰。欲求大法。峰曰。大法豈易求哉。須然指香可也。師曰。某今日親見和尚。大法豈有隱乎。峰嘿器之。授萬法歸一之語。服勤三年。大事未明。忽辭他行。峰曰。溫有瞎驢。淮有及菴。宜往見之。至建陽西峰。見及菴。菴問何來。師曰天目。菴曰。有何指示。師曰。萬法歸一。菴曰。汝作麼生會。師無語。菴曰。此是死句。什麼害熱病底。教汝與麼。師拜求指的。菴曰。有佛處不得住。無佛處急走過。意旨如何。師答不契。菴曰。者個亦是死句。師不覺汗下。後入室。再理前話詰之。師答曰。上馬見路。菴呵曰。在此六年。猶作者個見解。師發憤弃去。途中忽舉首見風亭。豁然有省。回語菴曰。有佛處不得住。也是死句。無佛處急走過。也是死句。某今日會得活句了也。菴曰。汝作麼生會。師曰。清明時節雨初晴。黃鶯枝上分明語。菴頷之。久乃辭去。菴送之門囑曰。已後與汝同龕。未幾。菴遷湖之道場。師再參。次命典藏鑰。菴嘗與眾言曰。此子。乃法海中透網金鱗也。一眾刮目以視。後靈隱悅堂閻公。會中居第二座。遂罷參。登霞霧山卓菴。名曰天湖。道洽緇素。戶履駢臻。伏臘所須。不求自至。凡樵蔬之役。皆躬自為之。有古德之風。禪暇喜作山居吟。傳者頗多。師於此山。有終焉之志。俄而嘉禾當湖。新創福源禪剎。以師之名聞。諸廣教馳檄敦請。為第二代住持。師堅臥不起。或者勸之曰。夫沙門者。當以弘法為重任。閒居獨善。何足言哉。於是翻然而起。大開鑪鞴。鍛鍊學者。談者以謂真能起及菴之家者也。居七年。以老引退。復歸天湖。至正間。朝廷聞師名。降香幣以旌異。皇后賜金襴衣。人皆榮之。師澹如也。至正壬辰秋七月廿有一日示微疾。閱二日。中夜與眾訣。其徒請曰。和尚後事如何。遂索筆書偈曰。青山不著鼻尸該。死了何須掘土埋。顧我也無三昧火。光前絕後一堆柴。擲筆而逝。闍維。舍利五色璨然。不知其數。其徒收其靈骨舍利。塔于天湖之原。以及菴之塔配之。示不忘同龕。師之意也。壽八十有一。臘五十有四。有弟子愚太古者。高麗人也。親得師旨。說偈印可。有金鱗上直鉤之句。其王。以國師之號尊之。聞師道行。意甚傾渴。表達。朝廷。詔諡佛慈慧照禪師。移文江淞。請淨慈平山林公。躬入天湖。取師舍利館伴歸國。平山與師為同參。皆愚公之本意也。師之上堂法語。山居詩頌。其徒至柔。刊行于世。且以師之行狀。徵予

銘之。予昔見師于福源。矍然其形。道韻可掬。今已四十餘年矣。  
因感慨而為之銘。銘曰。

西來直指	教外別傳	惟上根者	乃可得焉
傳亦無傳	得亦無得	如太虛空	蕩焉罔極
卷卷石屋	心如死灰	劃然頓悟	火裏蓮開
惠朗之孫	及菴之子	源清流長	根茂實遂
跡留霞霧	名落湖江	爭先快覩	景星鳳凰
人滅至今	幾三十禩	雙塔巋然	清風未已

---

## [CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

## [前往捐款](#)

---

## 信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

---

## 劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

---

## 線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

---

## 支票捐款



支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".

---